

ORANG ISLAM YANG TERKEMUKA

IBN BATTUTA

PENGEMBARA ISLAM YANG MASYHUR

Ketika “Marco Polo” mengakhiri pengembaraannya dan mencatat hasil-hasil perjalanannya, dalam masa itulah pula lahir di Tangier, seorang pengembara Islam yang terbilang di dalam sejarah dan terkemuka dalam kurun masihi yang keempat belas. Pengembara yang masyhur itu ialah Abū Abdullah Muhammad Ibn Abdullah, bergelar ibn Battuta.

Ibn Battuta lahir di Tangier (Morocco) dalam tahun 703 H (1304 M).

Riwayat hidupnya dalam masa muda tidak banyak diketahui begitu juga tentang didikannya. Selain daripada ia telah menuntut ilmu-ilmu agama. Tidak juga diketahui sebab-sebab yang membawa pengembara itu menghabiskan umurnya mengembara di serata dunia hingga hujung-hujung yang akhir dari bumi yang dikenal waktu itu.

BERANGKAT KE TANAH SUCI

Yang dapat kita ketahui hanyalah bahawa ketika ia berumur 22 tahun anak muda dari Tangier ini telah berazam hendak menunaikan haji dan berziarah ke Tanah Suci meskipun ia tidak cukup belanja yang akan menyampaikannya ke sana. Tetapi ia telah berazam dan tidak mahu mengalah kepada sebarang rintangan. Ibn Battuta pun belayarlah meredah Padang Sahara dan negeri-negeri Islam dari Tangier ke Mekah dengan menempuh berbagai-bagai kesukaran.

Ia telah meninggalkan Tangier pada bulan Rejab 725 H

(1325 M) dengan maksud “hendak ziarah ke Baitullah” katanya dalam riwayat pengembaraannya, “dan untuk menziarahi makam Nabi (SAW), seorang diri dengan tiada berteman yang boleh menghiburkan, tiada pula menyertai *kāfilah*, tetapi semata-mata di bawa oleh azam yang kuat meruntun”.

Perjalanan itu dimulainya dalam zaman pemerintahan Abū Sa‘īd ibn Abī Yūsuf, sultan Morocco dari keturunan raja-raja “Bani Marīn”. Ia telah melalui bandar Talisman kemudian al-Jazair hingga sampai di Tunis yang ketika itu dikuasai oleh Sultan Abū Yahyā ibn Zakarīya dari “Bani Hafṣ”. Pengembara muda itu tiada ditahan menderitakan sakit perpisahan dan tiada bercadang sama sekali hendak mengelilingi dunia. Bahkan semasa ia sampai di Tunis dan melihat tiada sahabat kenalan tempat menumpang sementara, perasaannya sangat terharu dan tak dapat menahan hati lalu menangis.

Dari Tunis ia telah mengikut *kāfilah* haji ke Tripoli (Trablus), dari sana ke Iskandariyah yang disifatkannya sebagai “pelabuhan yang dilindungi Tuhan,

tempat yang elok, penuh dengan pemandangan yang indah, benteng-benteng yang teguh, lengkap dengan segala kesenangan dunia dan kebahagiaan agama.”

Peristiwa itu terjadi setelah sepuluh tahun meninggalkan Tangier. Dari sana ia menuju ke bandar Kaherah yang digambarkannya dengan indahna:

“Kemudian sampailah aku ke Mesir, pusat dunia, tempat kedudukan Firaun, dengan wilayah dan bandar-bandarnya yang besar, penuh sesak dengan bangunan-bangunan teratur, pusat pertemuan dari berbagai-bagai lapisan, yang datang dan yang pergi, menjadi tempat pelarian dan perlindungan, baik bagi yang lemah tiada berdaya mahupun yang kuat berkuasa, penuh sesak dengan penduduk yang ramai. Darah mudanya sentiasa meluap-luap, walau usianya sudah begitu lanjut, bentengnya tiada pernah malap alamat berkat. Bandar Kaherah sebenarnya manawan bangsa-bangsa, dan raja-rajanya menguasai penduduk Arab dan ajam.”

Ibn Battuta tertawan hatinya melihat kemajuan dan kekayaan yang melimpah-limpah di Mesir, dan telah melawat merata-rata negeri itu sebagaimana dia telah melawat seluruh Iskandariyah, menggambarkan selengkap-lengkapnyanya akan menaranya yang terkenal dan lain-lain bekas peninggalan tua.

Segenap penjuru bandar Kaherah dengan masjid-masjidnya yang masyhur. Gedung-gedung dan bangunan-bangunannya habis dikunjunginya. Kemudian ia melawat hilir Mesir dari utara ke selatan, lalu ke hulu Mesir sampai ke hujungnya dan menyaksikan bekas-bekas tua peninggalan Firaun-firaun dahulu. Ia diperkenalkan kepada sultan Mesir, al-Nasir ibn Qala'un orang besar-besar dan hakim-hakimnya. Kemajuan dan peradaban negeri Mesir ditulis oleh Ibn Battuta satu persatu, sungai Nil, piramid (*al-Ihrām*) dan segi-segi penghidupannya.

Setelah itu ia melanjutkan perjalanannya di tepi laut merah dengan mengambil jalan padang pasir Sinai lalu menuju ke Bayt al-Quds dan melawat bangunan-bangunan tua yang bersejarah

di situ, baik bagi orang Islam atau Kristian.

Kemudian ia meneruskan perjalanannya ke utara di sepanjang pantai Palestin melawat Syria sampai ke Halab (Aleppo), dan selama kunjungan itu berkenalanlah ia dengan orang-orang besar dan golongan terpelajar, dengan tiada lupa menyaksikan masjid-masjid, sekolah-sekolah dan bangunan-bangunannya yang terkenal. Akhirnya ia berpatah balik ke selatan lalu menuju ke Damsyik. Keindahan bandar Damsyik telah menawan hatinya. Ada beberapa lamanya ia di sana, dan tidak ketinggalan pula mencatat dengan panjang lebar akan masjid Bani Umayyah (*al-Masjid al-Umawī*) yang masyhur, pasar-pasar, kebun-kebun, bangunan-bangunan dan hal ehwal penduduknya.

Di sinilah Ibn Battuta membaharui azamnya hendak meneruskan cita-citanya mengerjakan ibadat haji. Ia pun meninggalkan bandar Damsyik bersama-sama dengan satu *kāfilah* haji melalui jalan biasa hingga sampai di Madinah dan mengunjungi masjid Rasulullah (al-Ḥarām al-Sharīf) dan lain-lain tempat suci. Dari Madinah ia terus ke Mekah dan menunaikan ibadat haji, menyaksikan Kaabah suci, Masjid al-Ḥarām dan makam-makam lainnya. Dikhaskannya satu faṣal panjang dalam catatannya mengenai segala apa yang bersangkutan paut dengan keadaan Tanah Suci, tempat yang bersejarah serta cara-cara mengerjakan haji dengan menyebutkan riwayat yang bertalian dengan itu. Demikian juga perihal masyarakat bandar Mekah dan Madinah meliputi gambaran pasar-pasar dan bangunan-bangunannya. Sosok karangannya dalam bahagian ini menunjukkan hati hormat, khusyuk dan penuh dengan iman.

Tetapi yang peliknya Ibn Baṭūṭah tidak hendak kembali ke tanah airnya setelah tercapai maksudnya menunaikan ibadat haji sebagaimana yang mula-mula telah dirancangannya. Adalah dipercayai rancangannya hendak mengembara merata-rata dunia baharu timbul ketika ia berada di Tanah Suci. Tatkala orang-orang haji masing-masing berangkat balik kelihatan Ibn

Battuta menuju ke timur laut, ke negeri Iraq.

Ia telah meredah padang pasir semenanjung Arab dengan mengelilingi berbagai-bagai kesukaran dan merempuh bahaya.

Sebagaimana yang telah diketahui dalam perjalanannya dahulu ia telah melalui negeri-negeri Islam di sebelah Barat dan Timur

Mekah, tetapi daerah-daerah itu bukanlah asing dan rahsia

lagi. Mesir dan Syria biasa dikunjungi oleh

musafir-musafir dan ahli-ahli perniagaan yang datang dari Afrika

Utara dan tanah Sepanyol. Jalan itu ialah jalan

biasa dilalui oleh orang-orang yang naik haji pada tiap-tiap

tahun. Keadaan masyarakat dan adat istiadatnya lebih

dikenal orang di Afrika Utara dari daerah-daerah Islam

lainnya. Tetapi bertolak arah ke timur pada zaman Ibn Battuta

itu boleh dikatakan jarang sekali.

Semenjak saat itu ia mulai memasuki

daerah-daerah yang berbeza alam udaranya dari negeri-negeri yang

dijalaninya dalam pengembaraannya yang pertama (yakni dari tanah

airnya ke Tanah Suci Mekah), ia memasuki masyarakat

yang belum dikenal bentuk coraknya, walaupun mereka orang

Islam. Selain daripada itu ia menemui masyarakat yang

berbahasa asing, tidak tahu bahasa Arab yang biasa di dengarnya

selama ini. Di sinilah ketara dengan jelas kebolehan

bagaimana ia dengan tepat dapat menyelidik keadaan masyarakat

dan ilmu bumi negeri-negeri yang dilawatnya itu. Ketika

itulah pula Ibn Battuta mulai belajar bahasa Parsi

dan Turki. Bahasa Parsi menjadi bantuan kepadanya

dalam pengembaraan dilingkungan masyarakat India, sebagaimana

bahasa-bahasa Tartar (Tatar) menolong "Marco Polo" dalam

perjalanan di negeri Tartar.

Dalam perjalanan ke Iraq ia telah meredah negeri Najd

dan padang pasir semenanjung Arab. Daerah Iraq dan

bangunan-bangunan yang bersejarah telah ditulis oleh Ibn Battuta

menjadi suatu catatan yang istimewa. Kemudian ia

menyeberang sungai "Furat" dan "Dajlah" menuju

ke Iraq timur (Parsi). Dilawatnya Bandar-bandar Shirāz

dan Isfahān, dan dengan melalui jalan utara ia

balik semula menyeberang sungai Furat dan Dajlah ke Iraq

barat, akhirnya sampailah di Baghdad lalu pergi menghadap Abu Sa'īd Bahadur Khan sultan Iraq dan wilayah Khurasan.

Dewasa itu kekuasaan Baghdad telah lenyap, bandar

itu tidak menjadi ibu negeri lagi. Pada zaman itu

Baghdad diduduki oleh bangsa Tartar, semenjak tewas

al-Muktaṣim, khalifah yang akhir dari kerajaan Abbasiyyah (556 H-1258 M).

Kebesaran lama bandar itu telah tiada lagi, sebahagian

besar hanya tinggal bekas-bekas runtuhannya.

Kesan yang diterima oleh Ibn Battuta jelas terbayang

dalam catitannya mengenai Baghdad, bangunan-bangunannya yang bersejarah

masyarakat dan Kota al-Raṣāfah yang ketika itu penuh

dengan makam-makam khalifah.

Di sini ia menyentuh soal sejarah dan meriwayatkan

sejarah keluarga raja yang menguasai Iraq itu,

sebagaimana ia telah meriwayatkan sejarah raja-raja Seljuk

dan India yang sedang menduduki takhta kerajaan.

Dari sana ia telah melawat wilayah-wilayah yang dikuasai oleh

raja-raja Seljuk yang masing-masingnya sultan atau khān.

KE SELATAN SEMENANJUNG ARAB

Tidak dapat diketahui apakah yang menyebabkan Ibn Battuta

berpatah balik ke Baghdad dan ke Mekah. Hanya dalam kitabnya ada

disebutkan bahawa ia sampai di Mekah bagi kali yang

kedua, dalam keadaan sakit dan letih lesu. Di Mekah ia

beristirehat selama setahun, dan melanjutkan pengajiannya

setahun pula. Rupanya dalam masa itu ia telah mengambil

keputusan bulat hendak mengelilingi dunia, dan berkat

maklumat-maklumat yang telah didapatinya daripada orang-orang yang naik haji

yang berasal dari seluruh pelusuk dunia, dapatlah ia

(sambungannya pada muka 29)

(sambungan dari muka 20)

mengatur rancangan pengembaraannya itu.

Berangkatlah Ibn Battuta meninggalkan bandar Mekah lalu menuju ke negeri Yaman kemudian menyeberang Laut Merah lalu ke negeri Somalia. Kemudian berbalik semula ke semenanjung Arab lalu disusurnya pantai laut Arab sampai ke Oman dan Pulau Bahrain. Di sini ia telah menyaksikan penyelaman mutiara dan mencatat bagaimana caranya mengeluarkan mutiara itu. Kemudian ia meredah balik padang Sahara menuju ke Mekah dengan tujuan hendak menunaikan ibadat haji bagi kali yang ketiga.

Peristiwa ini terjadi dalam tahun 732 H (1332 M), dan ketika itu ia dapat berjumpa dengan Al-Mālik al-Nāṣir, raja Mesir.

KE MESIR DAN KONSTANTINOPEL

Dari Mekah ia telah berangkat menyeberang Laut Merah dan menuju ke Sudan, dari sana ia menuju ke Mesir dengan melalui negeri Nubah.

Tidak lama kemudian ia di Mesir lalu meninggalkan bandar Kaherah dan menuju ke negeri Syam dan ke Turki, iaitu pada tahun 733 H (1333 M).

Raja Turki ketika itu ialah Orhan Putra 'Uthmān pengasas kerajaan Uthmāniyyah Turki. Sungguhpun agama Islam telah tersiar rata di Asia kecil yang sedang dikuasai Turki tetapi belum begitu mendalam, dan kerana itu adat istiadat dan cara hidup penduduknya agak berlainan dari negeri-negeri Islam yang telah disaksikan oleh Ibn Battuta.

Negeri ini kelihatan baharu, alamnya menakjubkan. Ibn Battuta telah melawat rata-rata akan wilayah Anadol di Asia kecil dan mencatat dengan panjang lebar segala apa yang dilihatnya, baik tentang keadaan alam, bangunan-bangunan yang istimewa, hasil bumi, akhlak serta adat istiadat

penduduknya. Kemudiannya ia melawat wilayah yang dikuasai oleh sultan Ozbeg Khan sampai ke pantai Bosphoros, ditemani oleh satu rombongan utusan yang dihantar oleh sultan kepada Kaisar kerajaan Byzantine (Rom timur, yang beribu negerikan bandar Konstantinopel).

Kaisar yang sedang menduduki takhta kerajaan Byzantine dalam masa Ibn Battuta mengunjungi bandar Konstantinopel ialah Andronikus yang ketiga. Bersama dengan rombongan yang dihantar oleh sultan Turki Muhammad Ozbeg Khan bagi mengiringkan permaisurinya "Khātūn Filūn" puteri Kaisar Rom kerana hendak menziarahi ayahandanya. Sampailah Ibn Battuta di Konstantinopel. Ia turut menemani rombongan itu dan mendapat kehormatan yang selayaknya. Ia sampai di Konstantinopel setelah melalui perjalanan darat dan laut selama lebih kurang sebulan.

Ibn Battuta menceritakan ketibaannya ke situ dengan kata-kata yang menarik: "Kami memasuki Konstantinopel bandar yang besar itu, tepat pada tengah hari atau sedikit sesudahnya, bunyi-bunyi loceng bartalu-talu seakan-akan hendak menggoncang dan menelan bumi. Ketika kami sampai di pintu gerbang yang pertama dari istana Kaisar, kelihatan 100 orang pengawal dengan ketuanya dan kedengaran olehku mereka meneriakkan: "Sukarānū, Sukarānū!" (Sukrānū, ertinya: orang Islam).

Dalam lawatannya itu, Ibn Battuta telah ditanya oleh Kaisar tentang bandar Baitul Maqdis, batu keramat (batu tergantung), makam suci, Bayt Laham (tempat zahirnya Nabi Isa 'alayhi al-salām) dan bandar al-Khalīl, kemudian tentang Damsyik, Mesir, Iraq dan Asia kecil. Jawapan dan keterangan Ibn Battuta memuaskannya hati Kaisar lalu bertitah kepada putranya: "muliakan orang ini, dan peliharalah keselamatannya." Ibn Battuta telah dikurniakan persalinan, seekor kuda yang lengkap dan payung kebesaran.

Keindahan bandar Konstantinopel mencengangkan Ibn Battuta, lalu digambarkannya dengan indah, yang menunjukkan penyelidikan dan ilmunya yang dalam. Gereja besar “Santa Sofia” mendapat perhatiannya yang istimewa, diceritakannya dengan panjang lebar. Ia telah menziarahi pendeta-pendeta di sana dengan izin istimewa daripada Kaisar yang juga telah memberikan seorang penunjuk jalan yang menemaninya.

KE TURKISTAN DAN BALUCISTAN

Setelah beberapa minggu tinggal di Konsantinople, ia pun meninggalkan bandar itu lalu menuju Anadol Utara (di Asia kecil) dengan menderita sejuk yang sangat dahsyat, kemudian berpaling arah ke timur menuju ke Turkistan lalu singgah di Khawarizmi yang ketika itu termasuk dalam pemerintahan sultan Ozbeg Khan. Dari sana ia pergi ke Bukhārā yang telah dihancurkan oleh bangsa Tartar. Setelah ia menziarahi makam “imam Al-Bukhārī” ahli hadis yang masyhur dan mengelilingi bandar itu maka masa ia berada di sana digunakannya bagi menyelidik sejarah bangsa Tartar dari semenjak zaman Gengis Khan.

MENUJU KE INDIA DAN CEYLON

Dari Bukhārā, ia menuju ke Balocistan lalu masuk ke India dari arah barat laut. Sampailah ia di Punjab seperti yang telah ditulis olehnya, pada tahun 734 H (1334 M).

Di India mulailah suatu peringkat baharu dalam pengembaraan Ibn Battuta, dan jelaslah kepada kita kemahuannya yang keras hendak mengembara. Hasratnya amat besar hendak memasuki daerah-daerah India yang terletak di sebelah hulu dengan tiada mengendahkan kesukaran-kesukaran yang akan ditempuhnya. Ia telah meredah daerah-daerah India yang luas itu dari utara ke selatan dan dari barat ke timur, sambil

berhubung dengan raja-rajanya, baik yang Islam atau bukan. Akhirnya ia telah dilantik oleh sultan Ahmad Syah raja wilayah utara yang bertakhta di Delhi, menjadi hakim dan beberapa kali ditugaskan menjadi utusan. Ibn Battuta telah menulis dengan panjang lebar tentang sejarah kerajaan Delhi ini, adat istiadat dan kebudayaannya.

Ia telah mengalami lebih dari itu. Ia pernah beserta dengan suatu pasukan tentera dan telah ditangkap oleh musuh dan hampir-hampir hilang nyawanya, jika tidak kerana satu peristiwa yang ajaib.

Ibn Battuta bukan sahaja telah merata-rata mengembara sampai ke hulu-hulu daerah-daerah India bahkan ia juga telah mengembara merata-rata di air pantai sampai ke hujung selatan lalu menyeberang ke Pulau Ceylon dan menceritakan “tapak keramat” yang terkenal dengan “telapak Adam”.

Dalam bahagian ini pengembara Islam ini melukiskan kepada kita gambaran dan hikayat yang menarik. Diceritakan berbagai-bagai kepercayaan bangsa Hindu, adat istiadat keagamaan, tempat-tempat pemujaan dan kehidupan masyarakat dengan berbagai-bagai upacara yang ngeri, seperti membakar perempuan yang kematian suami (Suttee), melawat ke Sungai Gangga, tempat orang membuang diri menjadi korban penyembahan kepada dewa-dewa. Amat besar sekali kesan yang diterima dan rasa terharunya melihat upacara berhala yang menegakkan bulu roma ini, hampir-hampir jatuh dari atas kudanya ketika menyaksikan perempuan yang sedang dibakar hidup-hidup. Demikian pula tidak ketinggalan ia menceritakan keajaiban alam mengenai tumbuhan-tumbuhan atau haiwan yang didapati di negeri yang makmur itu. Gambarnya sangat menarik. (bersambung)

(diringkaskan dari “Abadi”. Karangan ini ialah buah pena Muhammad Abdullah ‘Ūnān Fansurah di Universiti Mesir dan diterjemahkan oleh Muhiyuddin Syaf. – P.Q).